



EDITORIAL

Bug-os kusog nga atuhan an bag-o nga rehimen Marcos

Sakob hin 40 katuig, ginhimo han pamilya Marcos an mga pinakamahugaw nga taktika han pan-nguwat, panhugay ngan pagbinuwa ha tuyo nga makabalik ha Malacañang. Yana nga nagmanilampuson hira hadin naglabay nga eleksyon, nag-iinapras hira nga seguruhon ngan ikandado an poder nga maiha nga panahon na nira gin-aawilan.

Klaro nga mayda bendisyon han imperyalismo nga US an pagdaug ko-mo presidente ni Ferdinand "Bong-bong" Marcos Jr. ha naglabay nga eleksyon. Kahuman pala maklaro nga nangunguna hiya ha ihap han mga botos, dayon hiya gindaup han mga guberno han Amerika ngan han mga kaalyado hini nga nasud. Ha ira mga patikang nga estorya, dagmit nga ginplastar an maka-imperyalista nga adyenda han pagpa-dayon ha mga usahan-nga-gapil nga kasarabutan ha ekonomiya ngan pu-

litika, nga napabor ha ira samtang matiyupion ha katawhan.

Naglalanat an mga Marcos nga konsolidahon an ira mga kaalyado agud hamison an mga butak ha ira ranggo, kahuman ini magpungkay ha hugaw ngan aringasa hadin eleksyon. Pinaagi han mga konsesyon ngan negosasyon, ginresolba nira dayon an agawan han mga senador ngan kongresista ha mga yawe nga pusisyon ngan komite, nga kada usa

"Bug-os..," sundan ha paypay 2

Kumander han tim han RCSP han 20th IB, ginsirutan han BHB

GINSIRUTAN HAN BAGONG Huk-bong Bayan an kumander han mga tropa han 20th Infantry Battalion nga nangunguna ha okupasyon militar ngan pasista nga terorismo ha usa nga baryo ha Northern Samar.

Namatay ha taktikal nga opensi-ba han BHB-Rodante Urtal Command hi Sgt. Marlon Baysa, tim lider han mga tropa han 20th IB nga nag-papatuman han operasyon nga Re-tooled Community Support Program (RCSP) ha Barangay San Francisco, Las Navas han nasering nga prubinsya. Ginpusil hiya ha usa nga sarayaw ha baryo hadton Mayo 10 dapit alas-9 han gab-i.

Grabe nga ginkakangalsan han mga taga-San Francisco an macho-pasista ngan paraghubog nga hi Baysa. Hiya an namumuno ha pag-kampo han mga sundalo ha butnga han baryo, nagmamandar hin pauru-utro nga interogasyon ha mga parag-uma ha katutnga han gab-i, nan-gigipit ngan nananarhug ha mga upisyal han barangay, ngan nangunguna ha irignom ngan kasamok ha baryo. Temporaryo hiya nga nabal-hin hadto kahuman hiya mag-aten-tar manlugos han usa nga babayi nga residente.

Antes hini, ginsunog han BHB-RUC an bakante nga kampo han mga sundalo apiki ha baryo hadton Mayo 5. (Kitaon an kasumpay nga balita ha

"Kumander..," sundan ha paypay 2

HA KAMATUORAN

20th IB, ginkakangalsan han katawhan

Diri pagsaludar kundi kangalas ngan pagsukna an pabalon han katawhan han Barangay San Francisco, Las Navas, Northern Samar ha pagkamatay han lider han mga tropa han 20th Infantry Battalion nga naghihimo hin operasyon nga Retooled Community Support Program (RCSP) ha ira baryo.


Kahaman sirutan han hukbo han katawhan an pasista nga hi Sgt. Marlon Baysa, ginpirit han mga sundalo an mga residente nga pumila ha gawas han ira mga balay. Iskema ngay-an ini agud uwaton hira ngan paagion ha ira atubangan an patay nga lawas ni Baysa ha usa nga hinimuhimo nga seremonya han "pagsaludar" ha pasista nga kumander. Gin-interogar pa ha hedkwarters han batalyon an mga upisyal han barangay ngan batan-on nga nagdumara han sarayaw diin namatay hi Baysa.

Dako nga buwa nga nasunod an mga tropa nga RCSP ha internasyunal nga makatawo nga balaud. Literal nga okupasyon militar an ira ginhihimo ha pagkampo ha tulo nga balay han sibilyan ha butnga mismo han baryo. Waray hira mag-ukoy ha ginpahimo nira nga kampo nga 200 kametros la an distansya tikang ha katapusan nga balay han baryo, ha tuyo nga himuon nga taming an mga sibilyan. Ginsunog han mga Pula nga mangaraway an nasering nga kampo. ■

"Kumander...", tikang ha paypay 1

igbaw.) Naghimo liwat hin taktikal nga opensiba an BHB-RUC ha Barangay Osang, Catubig hadton Mayo 8.

Grabe nga nalisang an pasista nga militar ha susru-nod nga opensiba han BHB nga ngadto na liwat ha mga sibilyan nakatadong an ira pagbulos. Kasunod han pagsirot kan Baysa, nanarhug hira hin panmomba kahuman la kuno malu-



bong an ira kumander. Damo nga residente an napiritan mag-ebakwet. Kalakip an San Francisco ngan Osang ha 10 nga magkarakit nga baryo nga naapektaran han terorista nga panmomba han AFP hadton

Septyembre 16, 2021. ■

"Bug-os...", tikang ha paypay 1

nagmamalakabawi han ira nagastos ha pangampanya. Nabug-os yana ha Senado an "supermayoriya" diin haros ngatanan nga senador kaalyado ni Marcos samtang pipira na la an natindog nga oposisyon. Papalingkuron naman ni Marcos ha gabinete an iya mga kaalyado ngan alipures nga nagin tangkod ha ira pamilya.

Importante ha mga Marcos nga "murayaw" ngan "nagkakaurusa" an iya mga alipures ha Senado, kongreso ngan gabinete, agud paspas nga maduso an mga kontra-katawhan nga balaud ngan palisiya nga magpapagrabe han kakurian han katawhan samtang magpapadako han ira kita. Impossible para ha masunod nga rehimen nga diri mandambong ngan makaghakin hin ganansya hin diri liwat ginpapagrabe an pagkaludlod han ekonomiya ha waray kapareho nga krisis, kawaray hin empleyo, ngan grabe nga kagutom nga gidaan ginpabagsak ngan ginlubong ha utang han rehimen US-Duterte sakob la hin unom katuig. An ekonomiya han Pilipinas nga laprak ha krisis ginlalasurbo liwat han bug-os nga pankalibutan nga sistema nga kapitalista nga ludlod ha panmaihaan nga krisis, nga mas naggrabe pa ha butnga han pagpintas han interimperyalista nga isan-isany ha ranggo han US, Russia, China, ngan han ira agaway para ha rekursos, teritoryo, ngan poder.

Ngatanan ini nahimo ni Marcos sakob la hin pira kasemana antes upisyal nga magtikang an iya termino. Sanglit importante kaupay nga magbantay gud ha kada nira pag-atentar nga kalimtan han katawhan an ira mga daan nga krimen, an ginhimo nira nga panlibo ha eleksyon, ngan an mga iskema nga karuyag nira igpatuman pagbalik nira ha Malacañang. Kinahanglan hugot nga subaybayan an dagmit nga nagbabag-o nga sitwasyon, ngan atuhan an kada kontra-katawhan nga palisiya ngan proposisyon. Gin-anunsyo na hadin naglabay nga plano hini igpadayon an programa nga Build, Build, Build, an pagbalik han Bataan Nuclear Power Plant nga makahiribang ha kalibungan, pagsarig ha natikadako nga langyaw nga utang, ngan an importasyon han bugas ngan iba pa nga agrikultural nga produkto. Kinahanglan magin militante ngan mabinantayon agud igsalikway ngan atuhan an diri lehitimo nga rehimen Marcos.

Samtang nagbabantay ngan nag-aandam ha mas mapintas nga pakig-away kontra ha bag-o nga rehimen Marcos, kinahanglan diri pasagdan nga matalwas ha baratunon an berdugo ngan pasista-terorista nga rehimen Duterte. Kinahanglan igpadayon gihapon an pakigbisog agud sukton ini, ipasulong an iya kaso ha International Criminal Court, ngan ig-insister nga papagbatunon hiya para ha iya mga krimen kontra ha katawhan. ■

Pulos han masa ha RCSP

Okupasyon militar, dugang nga kakurian

Usa nga interyor nga baryo an San Francisco ha hiluag nga pasakay han Catubig-Las Navas, usa ha mga ginsesering nga *rice granary* o mayor nga prodyuser han humay han prubinsya. Kadam-an ha mga taghimaryo nasarig dinhi para ha ira konsumo nga bugas. Ha luyo han kakablasan, marayhak an produksyon tungod ha ira buligay. Buylo an pakabuhi labina gud kun waray sundalo.

Yana, damo nga tindahan an ser-rado, damo nga balay an waray naukoy, ngan hiluag nga katunaan an diri gin-uuman. Mayda na kalsada kundi diri mga produkto an gin-gagawas. Damo nga taghimaryo an nagkagikan dara han panhadlok ngan pan-gigipit ha ira han mga tropa han 20th Infantry Battalion, nga "kauswagan" ngan "kamurayawan" man kunta an saad ha ira.

Maiha na nga pabalik-balik an sundalo ha San Francisco ngan ha mga kasapit hini nga baryo kundi hadton Marso 2020, nagbuylo an ira okupasyon han mga baryo. Nakidungan ha panlasurbo han pandemya an mga pasista nga tropa nga nagtikang maghimo hin operasyon nga RCSP.

Usa ha mga syahan nira nga ginhimo an interrogasyon ha tahub han "sensus." Nagbabalay-balay hira bi-

san katutnga an gab-i. Pokus han interrogasyon an mga upisyal han barangay ngan gin-*red-tag* nira nga masa. Ginpakitaan hira han ira litrato ha mga rali ngan gintahapan nga kaapi han Bagong Hukbong Bayan. Tikang hadto, nagin paura-utro na la an ira "sensus."

Labot hini, pausa-usa liwat nga ginpapatawag an mga "listado" para ha mapintas nga interrogasyon. Kahuman, pupwersahon ini nga "magamin" ha mga tahap ha iya ngan "sumrender."

Gidaan mayda mga organisasyon han parag-uma ha San Francisco kundi gin-*red-tag* ini ngan ginbungkag. Ginliwanan ini han mga makamilitar nga asosasyon nga waray man plano agud pauswagon an ira produksyon. Mayda mga umhanan nga ginruba para ha usa nga proyekto nga pangalsada.

Hasta yana ha butnga mismo han baryo nagkakampo an maabot 30 nga sundalo ngan Special Action Force han kapulisan. Hira an nangunguna ha bu-lang, huygo, irignom, ngan kasamok. Gin-uyaban nira an mga inasaw-an o menor de edad nga kababayin-an. Ha kahadlok nga atakihon han Pula nga hukbo, ginpipirit nira an mga sibilyan nga mag-alog, maglaba, ngan mangahoy para ha pagtindog han ira kampo.

Diri nalalain

Masobra duha katuig na an naglabay tikang han igpailarum ha RCSP an San Francisco. Hiton nga panahon, kadungan nga ginpailarum ha RCSP an kasapit hini nga Imelda, Quirino, Perez ngan San Miguel. Ngan antes pa hini, maiha na nga gin-ookuparan han militar an diri mamenos ha 500 nga baryo ha bug-os nga Eastern Visayas.

Pagbagsak han pakabuhi, pagkabungkag han mga organisasyon, waray tubtuban nga pangabuso—amo ini an nagigin kapulsanan han mga baryo, sugad han Barangay San Francisco, ha okupasyon ngan pag-ungbaw han paghahadi militar nga RCSP. ■

Mga retirado nga kadre, gintortyur antes patayon han AFP-PNP

DIRI TINUOD NGA namatay ha engkwentro an mga retirado nga kadre ngan mag-asawa nga hi Amado "Ka Butil" Adelantar ngan Maria Norie "Ka Cedang" Adelantar. Gintortyur antes patayon an duha han AFP-PNP hadin Marso 16 ha usa nga barangay ha Jiabong, Western Samar.

Basar ha *autopsy report*, tadtad hin *icepick* ngan mga luom an lawas han mag-asawa nga pangilal-an han grabe nga tortyur nga ira gin-agian ha kamot han mga pasista nga tropa. Mayda gihapon nakit-an nga usa nga bala hin pusil ha likod han talinga han biktima agud ipagawas nga namatay hira ha armado nga agway.

Retirado nga mga kaapi han Partido an mag-asawa nga Adelantar tikang pa hadton 2020. Maabot duha na hira katuig nga nakapahimutang gawas han mga yunit han BHB tungod ha edad ngan mga sakit nga gin-aabat. Mayda sakit nga *hypertension*, *diabetes*, ngan *acute urinary track infection* (UTI) hi Ka Cedang samtang mayda naman *hypertension* hi Ka Butil.

Dako nga buwa nga namatay an duha ha agway. An tinuod, *overkill* o grabe nga pandarahug an gin-gamit han *composite team* han 12th Special Action Battalion han PNP-SAF, Jiabong Municipal Police, Samar Provincial Intelligence Unit, ngan han 87th Infantry Battalion ha pagreyd ha duha nga retirado nga kadre.

Sukwahi ha pahayag han PNP Region 8, waray kamatuoran nga mayda nakuha nga *KG9-sub machine gun*, *MK2 hand grenade*, ngan iba pa nga magbakod nga higamit militar. Waray kapas umato ngan magdara hin mga granada an duha nga lagas nga kadre. ■

Tiunan-o nakabalik an mga Marcos ha poder?



Nakalingkod utro ha pinakahitaas nga pusisyon han reaksyunaryo nga burukrasya an pamilya Marcos diri tungod ha malimpyo nga eleksyon. Nakabalik hira tungod han pagpabor han imperyalista nga US, pagturupo han interes han naghahadi nga klase, ngan an dako nga kwarta nga ginkurakot tikang ha pondo han katawhan. Pira la ini ha mga baton ni Propesor Jose Maria Sison ha iya pitokapunto nga kabatunan nga ginhubad han Larab tikang ha serye han Paaralang JMS nga ginlansar hadton Pebrero 13.

1 SYAHAN HA NGATANAN, an naghahadi nga klase ha Pilipinas aada ha ilarum han imperyalismo nga US ngan karuyag hini nga magkamayda hin estabilidad an naghahadi nga sistema han mapatalsik hi Marcos ha poder hadton 1986.

Gindara han US an pamilya nga Marcos ha US agud tagan hin proteksyon. Ginkonsolida gihapon han US an militar, kapulisan ngan an burukrasya agud magpabilin an impluwensya han mga Marcos. Ginpugngan han US an pananamok ni Enrile ngan iba nga paksyon ha militar ha rehimen Aquino ngan ginpili hi Ramos agud ayuson an saramok han mga oligarko. Gintudlok han US hi Ramos komo sekretayo ha depensa ni Cory, ngan komo presidente hadton 1992.

2 Komo mga burukrata kapitalista ngan dagko nga komprador-asendero, magkapareho nga klase an mga Marcos ngan Aquino ngan magparatod an mga kaapi han ira paksyon.

Hadton 1989 tubtub 1991, ginkasarabutan nira Peping Cojuanco nga bugto ni Cory ngan an ira maka-Marcos nga patod nga hi Danding Cojuangco nga poyde makabalik ha Pilipinas an mga Marcos. Patod gihapon ni Marcos Sr. hi Ramos, nga nagserbe nga paragsumpay nira ni Cory.

3 Pakabalik ha Pilipinas, utro nga dinalagan an mga Marcos ha eleksyon agud makonsolida an ira mga balwarte ngan mahibalik an ira ngaran ha atensyon han publiko.

Dinalagan hi Imelda ha pagkapresidente hadton eleksyon 1992. An pinakaimportante para ha mga Marcos ngan Romualdez, nahakbot nira utro an lokal nga ehekutibo ha ira mga balwarte ha Ilocos Norte ngan Leyte.

4 Ginseguro han mga Marcos nga nasustiner an nasyunal nga atensyon ha ira ngan patikang nga pumusisyon ha mga nasyunal nga pwesto.

Nagpasamwak hi Imelda nga madalagan hiya pagkapresidente hadton 1998 kundi inatras hiya. Ginlalanat la niya hadto an atensyon han publiko.

Hadton eleksyon 2010, dinalagan hi Bongbong pagkasenador ha ilarum han Partido Nacionalista ni Villar. Tungod kay mayda hiya kwarta ha kampanya ha bug-os nga nasud, hiya an syahan nga Marcos nga utro nga naeleher ha nasyunal nga balitang.

5 Tikang hadton 2010 han pakalingkod ni Bongbong ha Senado, nahawan na an dalan para ha mga Marcos nga maglanat hin mga posisyon ha nasyunal nga balitang.

Dinalagan hi Bongbong pagkabise-presidente hadton 2016. Naperdi hiya kundi gintuyo nga maghimo hin panmaihaan nga elektoral nga protesta agud magpabilin hira ha nasyunal nga atensyon. Ginpabuylo liwat niya an propaganda ha *social media*. Nabutang gihapon ha nasyunal nga atensyon hi Imee han dumalagan hiya pagkasenador hadton eleksyon 2019.

6 Nagkumbinar ini nga mga salik agud mapabilin ha mga Marcos an ira kinawat nga karikuhan nga nakahipos ha sakob ngan gawas han nasud. Diri usahon nga mayda pagkaturupo hin interes an mga Marcos ngan tulo pa nga kurap nga nagin presidente: hira Erap Estrada, Gloria Arroyo, ngan Rodrigo Duterte. Butaray an ira konsabuhay ha luyo han kada taga nira nga duso ngan maniobra.

7 Nagamit han mga Marcos an ira karikuhan, impluwensya, ngan mga posisyon ha burukrasya agud pugngan an anuman nga mahinungdanon nga panunukot ha ira han katawhan.

Nahimo ini nira bisan ha mga natad han edukasyon, kultura, ngan mga pankatilingban nga institusyon—nga yawe unta agud epektibo nga tumuhop ha mas bata nga henerasyon an mga maranggat nga pag-ato ngan mapait nga leksyon han paghahadi han diktador hadton 1972-1986. Tungod hini, waray kaawod nga ginrebisa han mga Marcos an kasaysayan ngan nahimo pa nga igbalhin an patay nga lawas han hadto anay diktador nga hi Marcos Sr. ngadto ha Libingan ng Mga Bayani.

Ha utro nga paglingkod han pamilya Marcos ha poder, labi nga importante an buruhaton nga maglansar hin sistematiko ngan sostenido nga kampanya nga edukasyon agud adman an kasaysayan, labina han kabatan-unan, agud bug-os kusog nga atuhan an diktadura. ▣

#NeverForget!

(Diri hingalimtan!)

Mga krimen ha katawhan han pamilya Marcos

PARUPAN-NGAWAT

P1.1 katrilyon

an ira ginkawat sakob hin 20 katuig.

Poyde hini tagan hin **tag-5 kasako** hin *commercial* nga bugas (₱2,000 kada sako) an kada usa ha **110 kamilyon** nga Pilipino.

PARUPANALAPAS han tawhanon nga katungod

3,265 an ekstrahudisyal nga ginpatay

70,000 an gin-aresto

35,000 an gintortur

100 an pwersahay nga nawara

ha sakob han **14 katuig** han diktadura nga Marcos.

PAKURI HA KATAWHAN

Ha sakob hin 20 katuig

P65 kabilyon

an gin-utang kada tuig ni Marcos Sr. agud iglubong an Pilipinas ha grabe nga utang.

Batan-on hukbo han katawhan

Ha tono han "Ikaw ay Ako"

Ginkomposo ni Ka Ronan han BHB-Rodante Urtal Command

Ha mga kakurian

Mga batan-on pagmata na
Rebolusyon an paglaum ta

Hukbo han katawhan

Disiplina hugot nga katinan
MLM nga teorya aton
igsapraktika

KORO:

Partido an naggigiya
Hukbo han katawhan
Masa an sasarigan

Butukon an organisasyon

Pahiluagon ngan padig-unon
Pagiuson an hiluag nga masa
Pagrumpag han naghahadi
Bag-uhon an dunot nga sistema

Ha mga kakurian

Katalwasan an hingyap han masa
Para ha tuna nga nataw-an

Determinasyon han buruhaton

Ha damo nga mga leksyon
Kadaugan an direksyon
Ha mga kakurian naton

KORO:

Diri kita magtiwug-tiwog
Lugod nga pahitas-on
Pan-ideolohiya naton oh

Batan-on kumatin na han armas
Depensa han aton lawas
Hul-os an pagserbe
Pag-agaw han poder pulitika
Pagbag-o han katilingban

DRK an ginlalansar

Sosyalismo makakab-ot

